

Hala di Hospital a Bini Cla

(Continuo di pagina 1)

te 4 p.m. y 6 te 8 p.m.

E edificio nobo cu ta trahá pa resisti candela probablemente lo worde poni na uso medio otro luna. Tur paseonan ta worde haci promer cu e lugar worde ocupá pa no molestia e pacientenan of trabaoonan normal den hospital.

E hala di e edificio bieuw cu tabata haci uso como cushina, lo worde kitá, mientras tur e resto, incluyendo tur espacio anterior di pone cama, lo worde tumá na uso pa clinico y otro servicionan general medico.

E seccion nobo ta un estructura atractivo y cu bunita apariencia. Tanto for di pafor como di paden, apariencia di e unidad nobo ta uno cu ta sugeri maximo comonidad y cuida pa pacientenan nobo y recuperando.

Proyectá Pa Weed

Trahá henteramente door di personal di Lago na un costo di mas cu dos million florin, el a worde proyectá pa Robert Law Weed, un arquitecto di Miami. E estructura di tres piso cu ta cara pa Lamar Caribe tin 80 camber plus excusado; 42 di e cambernan ta pa paciente, y nan tin espacio pa 120 cama. Tur cambernan pa paciente ta na banda mas pariba di e edificio asina cu nan por saca ventaha di e brisa natural. Tur cambernan di utilidad, lavatorio, oficina di doctor y cambernan di examinacion, y cushinanan di sirbimento ta na banda pabao den e seccion nobo.

E tres pisonan cada uno lo worde usá pa sorto di casonan specifico — un otro di e hopi planan ariba termino largo di Departamento Medico pa establece maximo eficiencia y comonidad pa pacientenan den e cambernan nobo. Banda pabao na promer piso lo worde usá pa casonan di operacion; banda pariba pa mucha. E segunda piso ta henteramente pa medicina internal y casonan di isolacion. Na banda pabao di e seccion tin un cuarto di isolacion cerrá. E tercer piso ta henteramente pa casonan obstetrico y ginecologia y ta inclui lugar pa mucha chikito.

Medidan Di Emergencia

Un di e hopi factornan importante di e edificio nobo ta e preparacion cu e lugar nobo ta contene pa cualkier caso di emergencia. Considerando candela promer, e edificio ta henteramente resistente contra candela. Belnan di candela ta poni den henter e edificio na lugarnan conveniente y claramente visible. Si e bel worde halá, un luz corrá ta cende na e mesa di informacion spiertando e klerk cu ta sintá aya na tur ora. Ademas di e luz corrá cu ta cende, un gong ta zona na intermedio constante cual segun codigonan specifico ta localiza den cual seccion di e edificio alarma a worde haci.

Trahadornan na Hospital sabi mes ora unda e dificultad ta pa medio di e sistema codigo y por tuma medida sin perde tempo. Tambe den e sistema automatico tin dos porta di huma na cada uno di e pisonan. Ora alarma worde haci, e portanan aki ta cerrá automaticamente protegando e coreldornan y pacientenan di huma. Salidanan ta marcá claramente cu globonan grandi corrá pa elimina posible confusion. Portanan di emergencia den caso di candela ta trahá na cada banda di e edificio. Esun na banda pabao ta completamente encerrá, mientras esun di banda pariba ta habri adilanti.

E cambernan nobo nunca lo por ta sin electricidad. E hospital ta inclui den un sistema dobbel. Si acaso electricidad faya di pasa den un "feeder", auto automaticamente esun ta cuminsa traha. Si tur dos "feeder" cai afor — loke ta casi imposible — un sistema electrico automatico movi pa un unit den cuarto di boiler na hospital lo procura pa e energia necesario unbez. Pa protega mas leu un entrega continuo for di e generador di gasoline di 75 KVA na hospital, na e instante cu e energia auxiliar aki cai aden, un luz corrá ta cende na mesa di informacion. E klerk adverti na e mesa anto ta yama Utilities y un homber ta worde dispatchá pa Hospital y esaki ta para un banda

cerca e generador te ora coriente cuminsa pasa door di e lineanan mayor atrobe.

Ora e unit auxiliar di energia na hospital ta na uso e ta duna coriente na un sistema di emergencia den henter hospital cu ta goberna luznan di yamada, oloshi, outlet, e elevador na banda pabao di e edificio nobo, luznan necesario, y otro aparatonan electrico cu ta necesario pa actividadnan di hospital sigui normalmente. Tur elementonan ariba e sistema di emergencia ta worde identificá pa cuadranten chikito corrá ariba e varios aparatonan.

Drentando e edificio nobo, e bishitante ta dreña den un salon brillante y moderno. Banda pariba y pabao di e salon ta encerrá cu platinan di glas. E mesa di informacion, unda bishitantenan mester registra promer cu dreña cambernan di paciente, ta den e salon aki y tambe e switchboard di telefon. Poco pafor di e salon — na banda pabao — un lugar pa pacientenan recuperando a worde trahá.

Entrada pa di promer piso — usá pa muchanan y casonan di operacion — ta directamente na banda pafor di e salon principal. Ariba segunda y tercer piso, e coreldornan principal ta sali for di den salonnas mas chikito. E salon principal y esnan ariba e siguiente dos pisonan ta atractivamente amueblá pa conveniencia di bishitantenan. E pisonan mas halto di e seccion nobo por worde alcanzá sea pa medio di e elevador of pa medio di trapi.

Basicamente, e tres pisonan ta mescos segun locacion di cambernan, veranda, cambernan di utilidad, mesa di nurse y lavatorio. Nan ta diferencia solamente unda requerimentonan di hospital pa un planta funcionando suavemente ta haci esaki necesario. Un cuarto di isolacion a worde trahá ariba di dos piso, y proyeccion di e tercer piso necesariamente ta diferente pa acomoda casonan obstetrico for di ora e mama prospectivo dreña hospital te ora el sali cu su yiu chikito.

Tur cambernan di pacientenan ta equipá na mes manera. Cada cama tin su mesita na banda y un mesa di ariba cama y iluminacion individual. Un paciente cu ta leza den su cama por haci uso sea di iluminacion directo of indirecto simplemente door di hala un switch den e muraya ariba e cama. Na cada cama tin un bel pa yama nurse. Tin cuatro stoel ordinario, dos stoel di sosiego y un stoel largo sin leuning. Cada camber tin amplia espacio di closet trahá aden y un cuarto di banja privado cu douche y tambe facilidatnan di toilet. Vloer di e cambernan ta di azulejo preto cu blanco. E murayanan ta geverf berde-cla.

Tur Cambernan Ta Comodo

Siendo localizá na banda pariba di e seccion nobo, tur cambernan di paciente lo ta fresco y lo haya un claridad agradable. Bentananan di glas ta laga claridad di dia dreña — rayonan penetrante di solo lo no molestia pacientenan, gracias na e cuberturanan corrá ariba e bentananan. Jaloezie ariba e glas, y ventiladornan bao di e bentana ta permiti e brisa pa dreña. Un tunnel di aire, trahá ariba e coreldor, ta hiba e brisa for di banda pariba pa e oficianan, cambernan di utilidad, y otro lugarnan na banda pabao.

Un aspecto interesante ta e manera den cual Departamento Medico a equipa camber di muchanan den e seccion di mucha. E camanan di mucha ta halto pa facilita cuida di nurse pa e muchanan. Cambernan di banjo tur ta di tamanjo chikito pa encontra necesidad di esnan chikito. Den e cuartonan aki tin banjonan chikito cu un sienta trahá aden pa e banjadornan joven.

Ademas di e varios sorto di cambernan identico na cada piso, un cushina chikito di sirbimento y veranda encerrá tambe ta forma un seccion di cada piso. E verandanan ta pa pacientenan sosega. E Seccion actual den e edificio bieuw lo bira cushina principal pa henter hospital. Cuminda pa e seccion nobo lo worde

prepará aki den y transportá den unitnan cu ta tene cayente pa medio di coriente na e varios pisonan. Dos mesa portatil pa sirbimento ta trafica e tres pisonan pa hiba cuminda y remedi.

E coreldornan ariba e tres pisonan ta mescos den proyeccion, color, y sitio. Murayanan di e coreldor ta shinishi; e vloer ta di azulejo corrá, y e plafond ta resistente contra zono. Portanan cu ta habri den e coreldornan ta cuatro pia hancha pa facilita movimiento di cama y herment. Tambe na banda di e coreldornan tin facilidatnan di toilet pa hendenan cu ta traha na hospital y bishitantenan.

Na banda pabao di segunda piso ta e cuarto di isolacion. E ta consisti di tres camber y un camber di utilidad. E tres cambernan di isolacion pa pacientenan tin bentana grandi di glas den e porta pa permiti bishitantenan mira e pacientenan den e seccion aki.

Pa mamanan cu ta spera yiu, mamanan nobo, y muchanan recién naci, e seccion obstetrico na tercer piso ta completo for di feneta te broeki y aparatonan grandi auxiliar pa duna-miento di luz y di sterilizacion. Cu cara pa lamar tin dos camber di dolor y un camber di duna luz. E cambernan di dolor y e camber di duna luz ta banda di otro cu porta ta habri den otro. E locacion aki ta haci posible pa mamanan cu ta spera yiu worde hibá directamente for di den e camber di dolor pa e camber di duna luz sin pasa den e coreldor. E cambernan di dolor y e camber di duna luz ta keda na banda di lamar di e hala.

Seccion Di Duna Luz

E seccion di duna luz ta tuma e parti mas pabao ariba di tres piso. E ta completo den su mes. E seccion ta prepara pa trata cualkier emergencia cu por presenta durante duna-miento di luz. Na ningun tempo e seccion aki lo tin mester pa yama ayudo di otro facilidatnan di hospital. E camber di duna luz ta un camber grandi y cla. Tur switchnan electrico y outlet ta e tipo di seguridad pa protega ocupantenan di e camber ora anesthesia ta worde usá. Tambe den e seccion di duna luz tin un camber pa e parteronan, kende, sperando un duna-miento di luz anochi, por drumi ey den. E seccion di duna luz ta cerrá pa tur hende, excepto personal di hospital.

Na banda pabao ariba di tres piso tin e cambernan di muchanan recién naci. Pa conveniencia di tatanan orguyoso, bentananan grandi di glas ta permiti "papa su promer vista." Un camber chikito di incubador tambe tin un bentana di plachi di glas pa mira e chikitonan cu ta sosega den nan. Conectando e dos cambernan di mucha chikito ta un camber grandi di traha pa e enfermeronan cu ta percura pa e muchanan recién naci.

Un procedimiento nobo a worde estableci pa bishitantenan. Ora nan dreña hospital, bishitantenan mester acudi na e mesa di informacion den e salon principal. E klerk di informacion lo duna cada bishitante un carchi cu ta duna'e autorizacion pa haci bishita. Bishitantenan lo no worde permiti pa dreña den camber di pacientenan sin un carchi. Cada paciente por recibí dos bishitante den un bisha ademas di miembronan di familia. E carchinan aki mester worde debolbí na e mesa di informacion ora bishitantenan ta sali for di hospital.

Oranan di bishita pa e cambernan nobo lo ta mescos cu esun estableci anteriormente pa e edificio bieuw. Hende grandi por worde bishitá for di 2 pa 3 p.m. y 6 te 8 p.m. Muchanan por worde bishitá for di 2 pa 3 p.m. y 6 pa 7 p.m.